

BIDE PUBLIKOAN TERRAZAK, SALGAI DAUDEN PRODUKTUEN ERAKUSLEKUAU ETA BESTE ELEMENTU LAGUNGARRIAK JARTZEA ARAUTZEN DUEN ORDENANTZA

I. TITULUA. XEDAPEN OROKORRAK.

1. artikulua. - Ordenantzaren xedea.

Ordenantza honek xedea hau du: Aire zabaleko erabilera publikoko espazioetan, jarduera ekonomikoek, jarduerari lotutako elementuez bide publikoa, nahiz jabari pribatuko lurzoruak okupatu ahal izateko araudi tekniko eta juridikoa ematea. Era berean, aipamena egingo zaio, etekin asmorik ezean, baimen bereizturik eskatu beharrik gabe, herritarrek mahai eta aulkiak kalera ateratzeko aukerari.

2. artikulua. - Aplikazio-eremua.

Ordenantza hau udaleko erabilera publikoko aire zabaleko espazio guztiei –titulartasun publikokoak nahiz pribatukoak– aplikatzen zaie (kaleak, plazak, etxadien arteko patioak, arkupeak, oinezkoen espazio libreak, berdeguneak...).

Espazio bat erabilera publikokotzat hartzen da espazio horrek izatez duen erabilera kontuan hartuta nahiz indarrean dagoen hiri-plangintzaren zehaztapenak aplikatuta. Ordenantza honen barruan kontuan hartuko dira titulartasun eta erabilera pribatua duten espazioetan jartzen diren terrazak.

Halaber, ordenantza honen xedetik kanpo daude baldintza hauek betetzen dituzten instalazioak:

a) Jabari publikoko ondasunetan egonik, udaleko kontzesio administratibo baten babesean aurrera eramaten diren jarduera osagarriak.

b) Udaleko organo eskudunak ezarritako egutegiaren arabera, herrian ospatzen diren jaietan egiten diren aldi behingo jarduerak.

3. artikulua. - Araudi aplikagarria

Ordenantza hau ondorengo arauok emandako ahalmenen arabera egin da: Toki Araubidearen Oinarri buruzko 1985eko Legearen 49. eta 84. bis 1.a) artikulua, Euskadiko Toki Erakunde buruzko apirilaren 7ko 2/2016 Legea, Herri Administrazioen Ondareari buruzko azaroaren 3ko 33/2003 Legea, Toki Araubideari (Herri Administrazioei) buruzko azaroaren 3ko 33/2003 Legearen Erregelamendu Orokorra onartzen duena, eta Toki Erakundeen Ondareei buruzko 1986ko Erregelamenduen 77. artikulua, eta Toki Erakundeen Ondareei buruzko Erregelamendua.

Orokorrean, bide publikoan terrazak, salgai dauden produktuak erakuslekuak eta beste elementu osagarri batzuk jartzeko araudia aurrez aipatu ditugun xedapenetan eta honako hauetan ezarritako aurreikuspenetara egokituko da:

a) Arloan indarrean dauden legezko xedapenak, orokorrak eta berariazkoak. Ordenantza hauek formulatzean indarrean ziren legezko xedapenen artean hauek aipa daitezke, alde batera utzi gabe haien eguneratzeak, moldaketak, indargabetzeak eta aurrerago onartutako xedapen berriak, eta alde batera utzi gabe arloan aplika daitezkeen gainerako xedapen hauek:

* 10/2015 Legea, abenduaren 23koa, Jendaurreko Ikuskizunen eta Jolas Jarduerena.

* 17/2019 Dekretua, otsailaren 5koa, jendaurreko ikuskizunen eta jolas-jardueren Legea garatzeko Erregelamendua onartzen duena.

b) Indarrean den hirigintza plangintza.

c) Ordenantza hau.

4. artikulua. - Baimenen izaera.

Bide publikoaren okupazioak eta ustiapenak ohiko erabilera berezien kategoria juridikoan sailkatuta daude; jabetza-eskubiderik gabe ematen dira eta beste pertsonen eskubideak erabiltzeari ezertan eragotzi gabe. Aurrez, udalaren baimena behar da, eta hori ordenantza honetan aurreikusitakoaren arabera emango da.

Orokorrean, herritarrek mahai eta aulkiak kalera ateratzeko ez dute baimenik eskatu beharko, beti ere egin nahi duten ekintzak beste araudiren batekin talka egiten ez badu.

Udal lizentziaren eskaera egin ahalko dute, soilik, ostalaritzako edo saltoki establezimenduen jarduera lizentziaren gaineko titulartasuna dutenek, baldin eta establezimendu horien funtzionamendua eta jarduera dagokien arau urbanistiko eta sektorialen arabera eramaten badira aurrera.

Terrazen eta erakuslekuen lizentziak nahitaez uztartuta geratuko dira dagokien ostalaritzako edo saltokietako establezimenduen lizentziekin, eta, beraz, ezingo dira eskualdatu establezimendu horien jardueretatik berezita. Ostalaritzako establezimenduaren titulartasuna aldatuz gero, terrazaren lizentziaren gaineko titulartasuna galdu egingo du lehengo titularrak eta titular berriak terrazaren lizentzia eskualdatzeko eskaera egin beharko du espresuki. Bi lizentziek, beraz, transmisio berezia izango dute.

Gainera, prekarioko lagapenak izaten dira eta atzera bota daitezke interes publikoko arrazoiengatik, kalte-ordainak jasotzeko eskubiderik gabe. Partikularrak ez du baimena eskuratzea bermatzen dion eskubiderik, hortaz, kasu horietan baimena ematea hautazkoa da; edonola ere, hartutako ebazpena arrazoitu beharra dago.

Zoru publikoa okupatzeko baimendutako aldiak aldatu egin daitezke hauen ondorioz: turismoarekin, merkataritzarekin edo jaiekin lotutako jarduerak, obrak edo ekitaldi publikoak, Udalak antolatutakoak. Halaber, aldi horiek aldatu egin daitezke beste interesdun batzuek jarduerak egin behar badituzte, eta jarduera horiek administrazio honek baimendu beharreko eskubideekin lotuta daudenean.

Lizentziak urte baterako edo denboraldi baterako emango dira, egin den eskariaren arabera eta araudi honen 8 artikulua xedatzen duena kontuan izanik.

Baimenen titularren arrisku eta menturan eramango da aurrera jarduera. Debekatuta dago ordenantza honetan zehazten ez diren altzari edo elementuak jartzea.

Baimendutako espazioaren gehieneko okupazioa zehaztuz emango dira lizentziak, mahai-moduluak eta utzi beharreko pasabideak kontuan hartuta. Kasu bakoitzean, titularrak erabakiko du zenbat mahai jarriko dituen eta zenbat denborarako, eta dagokion tasa ordaindu beharko du. Beti ere araudi honen 10. artikuluan zehazturiko muga eta baldintzekin.

5. artikulua. - Okupa daitezkeen espazioen ezaugarriak.

Hainbat espazio publiko mota bereizten dira, erabileraren eta eremuaren arabera:

I. mota. Ibilgailu zirkulazioa duten kaleetako espaloiak

II. mota. Oinezkoen kaleak.

III. mota. Plazak eta oinezkoen beste espazio batzuk.

IV. mota. Aterpeak

V. mota. Baimen bereziko espazioak

II. TITULUA. ZEHAZTAPENAK.

II.I. ATALA. DEFINIZIOAK.

6. artikulua. - Ordenantzak arautzen dituen elementuen definizioak.

Ordenantzak espazio publikoan kokatu daitezkeen hurrengo elementuak arautzen ditu: terrazak, salgai dauden produktuen erakuslekuak, eta elementu osagarriak.

Terraza esaten diogu jarduera gauzatzeko indarrean dagoen araudiaren arabera irekitzeko lizentzia, aurretiatzko komunikazioa edo habilitazio-titulua duen eta publikoari irekita dagoen ostalaritza-jarduera baten osagarri gisa balio duen (batera edo banaka, eta modu iraunkorrean) mahai, aulki, toldo eta behin-behineko instalazio mugikorren multzoari.

Salgai dauden produktuen erakuslekua esaten diogu jarduera gauzatzeko indarrean dagoen araudiaren arabera irekitzeko lizentzia, aurretiatzko komunikazioa edo habilitazio-titulua duen jarduera baten osagarri gisa denda baten kanpoan jartzen den behin-behineko elementu mugikorrari, produktu jakin bat nabarmentzea eta bezeroari eskura jartzea helburu duenari.

Elementu osagarritzat hartzen da terraza edo salgai dauden produktuen erakuslekua ez den eta hilabete baino gehiagoko denbora-tartean ostalaritza- edo merkataritza-saltoki baten kanpoaldean jartzen den beste edozein elementu, jarduera gauzatzeko indarrean dagoen araudiaren arabera irekitzeko lizentzia, aurretiatzko komunikazioa edo habilitazio-titulua duen jarduera baten osagarri gisa. Definizio horren barruan sartuko lirateke dekorazio-elementuak, elementu ludikoak, jolasarekin lotutakoak...

7. artikulua. - Terrazetako elementuen definizioak

Terrazetan baimendutako elementuen definizioak:

1. Moduluak:

Mahai eta aulkiez osatutako multzoak dira, ezaugarri eta tamaina zehatzekoak. 3 modulu mota ezartzen dira eta horrez gainera modulu bereziak aurkezteko aukera eskaintzen da. Moduluen arteko gutxieneko distantzia ere errespetatu beharko da terraza barnetik pausua bermatzeko.

2. Mahai irisgarriak:

Irisgarritasun baldintzak betetzen dituen mahai eta aulki multzoa. 5 mahai baino gehiago dituzten terrazak gutxienez bat izan beharko dute.

3. Albo-babesak (manparak edo loreontziak):

Horiek jartzeko berariazko lizentzia eskatu behar da. Segurtasuna bermatzeko beharrezko direnean derrigorrezkoak izango dira. Haizetik babesteko balio dezakete edo naturaren presentzia areagotzeko. Terrazak okupatzen duen eremuaren barruan jarri behar dira.

4. Eguzkitakoak:

Eguzkitatik babesteko elementu mugikorak dira. Terrazak okupatzen duen eremuaren barruan jarri behar dira. Ez da behar berariazko lizentziarik horiek jartzeko.

5. Toldoak:

Zoladurara finkatu ezin diren egitura autosostengatzaile mugikorak edota fatxadara soilik lotuta zabaldu edo jasotzen diren estalki egiturak dira. Terrazak okupatzen duen eremuaren barruan jarri behar dira. Horiek jartzeko berariazko lizentzia eskatu behar da.

6. Garbitasunerako elementuak:

Mahai gaineko hautsontziak. Beharrezkoak izango dira eta terrazak okupatzen duen eremuaren barruan jarriko dira.

7. Informazio modulua:

Informaziorako modulua, ostalaritza establezimenduak jakitera eman nahi duen informazioa helarazteko panela; arbel motakoa edo paperean informazioa itsatsia duena izan daiteke. Terrazak okupatzen duen eremuaren barruan jarri behar da.

II.II. ATALA. DENBORALDIK ETA ORDUTEGIAK

8. artikulua. - Iraupena, denboraldia eta indarraldia

1. Terrazak jartzeko lizentziek bi iraupen izan ditzakete, eta lizentzia beraren barruan konbinatu egin daitezke iraupena eta ezaugarriak (mahai kopurua...):

a) Urtebeterako.

b) Aldi baterako: Udako denboraldia (maiatzaren 1etik urriaren 31ra).

2. Emandako baimena automatikoki berrituko da datozen ekitaldietarako baldintza berberekin eta epe berdinerako, baldin eta aurretik ez bazaio Hernaniko Udalari baja emateko idatziz eskatu.

Luzatutako lizentzia eraginkorra izan dadin eta terrazen, salmentarako erakuslekuen eta elementu osagarrien erabilera gaitu dezan, lizentziaren titularrak aurreko baimenari dagokion tasa ordaindua izan beharko du urte horretako ekitaldian bide publikoa erabiltzeagatik, eta indarrean mantendu beharko du ordenantza honetan ezarritako betebeharrak betetzearen berme gisa ordaindutako fidantzaren baliozkotasuna, edo, hala dagokionean, fidantza berri bat. Aurreko baimenaren tasa ordaindu gabe baldin badago ez da lizentzia luzatuko.

9. artikulua. - Garaiak, ordutegiak eta mugak.

9.1. Ordutegi orokorraz gain, aparteko bi garai bereizten dira: terrazak jartzeko aukera mugatu edota ixteko ordutegiak desberdintzen dituztenak:

Ordutegi zabaleko garaia: ekainaren 1etik irailaren 30era.

9.2. Terrazak kanpoan jarrita egon daitezkeen ordutegien mugak, establezimenduen ordutegia edozein delarik ere, honako hauek dira:

a) Ordutegi orokorra:

Terrazak jartzeko ordutegia:

Astegunetan: 8:00etan.

Asteburuan: 9:00etan.

Terrazak kentzeko ordutegia:

Igandetik ostegunera: 23:00ak arte.

Ostiral, larunbata eta jai-bezperatan: 00:00ak arte.

b) Ordutegi zabaleko garaia (ekainaren 1etik irailaren 30era):

Terrazak jartzeko ordutegia:

Astegunetan: 8:00etan.

Asteburuan: 9:00etan.

Terrazak kentzeko ordutegia:

Igandetik ostegunera: 23:30ak arte.

Ostiral, larunbata eta jai-bezperatan: 00:30ak arte.

9.3 Bestelako mugak

a) Terrazak hasierako ordutegiarekin batera jarri ahal izango dira, alegia, ezingo dira aurretik ipintzen hasi.

b) Terrazak kentzeko, terrazen ordutegia amaitu eta hogeita (20) minututan gehienez jasota egon beharko dira.

c) Terrazako ordutegia amaitzean terrazako elementuak lokalaren barrura sartu beharko dira edo bide publikoko baimendutako espazio batean pilatu.

d) Terrazetako edozein elementu jarri, bildu eta mugitzaerako momentuan zaratarik gabe egiteko neurriak hartu beharko dira.

9.4. Merkataritza-establezimenduetako erakuslekuak (janari dendak, okindegiak, pasteleriak...) eta elementu osagarriak jartzeko ordutegia merkataritza-establezimenduak zabalik mantentzen den ordutegi bera izango da. Nolanahi ere, ezin izango dira 08:00ak baino lehen jarri, eta 20:00ak baino lehen kendu beharko dira.

Merkataritza-establezimenduren batek terraza jartzeko lizentzia balu, hau jarri edo kentzeko baldintzak gainerako ostalaritza-establezimenduen berdinak izango dira eta ezingo dira jarrita eduki establezimenduak bete beharreko gehieneko ordutegitik kanpo.

9.5. Eskumena duen organoak terraza kentzeko ordutegia aldatu dezake salbuespenez, bai udalerrri osoan, bai zati batean, herriko jaiak edota garrantzi bereziko egunak direlako edo bestelako egoeraren batek hala baimentzen badu.

9.6. Oinezkoen kaleetan eta oinezkoak zein ibilgailuak ibil daitezkeen kaleetan, kasuan kasu aztertuko da terraza zamalanen ordutegiaren barruan jarri ahal izatea. Terraza zamalanen jarriotasuna oztopatuko balu, neurriak hartuko dira.

9.7. Udalak antolatutako edozein ekitaldi egiteko erabiltzen diren espazio publikoei dagokienez, terrazak jartzeko ordutegia ez da hasiko udal-zerbitzuek jasotzen eta garbitzen amaitu arte.

9.8. Terraza erabiltzearekin lotutako molestiak direla eta, bizilagunen edo beste kaltetu batzuen keak jasotzen badira behin eta berriz, eskumena duen organoak, behin egiaztapenak eginda eta egoki irizten badio, ixteko ordutegia muga dezake aldi baterako edo behin betiko, eta, hala dagokionean, atzera bota dezake lizentzia; kasu horretan, kendu egin beharko litzateke instalazioa.

III. TITULUA.

III.I. ATALA. INSTALAZIOEN BALDINTZAK

10. artikulua. - Baldintza orokorrak.

a) Gehienez 12 mahai jarri ahal izango dira. Lokalak bi sarbide baldin baditu bi fatxada ezberdinetan, gehienez 16 mahai jarri ahal izango dira guztira. Fatxada batean jarri daitekeen mahai kopurua ezin izango da inoiz 12 baino gehiagokoa izan. Lokal baten bi fatxadak angelu zuzenean baldin badaude, terraza ezin izango da jarraia izan.

b) Terrazaren azalerak ezingo du gainditu ostatuaren fatxadaren luzera, espazio-beharrengatik alboko etxaurreak okupatzeko baimena eskatu ezean. Horrelakoetan, eraikin horietako establezimenduen adostasuna beharko da, eta berarekin adostu beharko du fatxadaren zein portzentajea utziko dion zesioan.

c) Oro har, terraza osoa ostalaritzako establezimenduaren ikusmen angeluan egongo da, 15m-ko distantzian, gehienez ere, baldin eta segurtasun arazoak direla-eta terraza tarte horretan ezartzea desegokia ez bada.

d) Elkarren alboz alboko establezimenduetan terrazak ezartzekotan, lerrokatuta ezarri beharko dira, oinezkoen joan-etorriak zuzenak izan daitezen eta sigi-sagan ibili beharrik izan ez dezaten.

e) Inguruko etxebizitza eta lokaletarako sarbidea libre utzi behar da, gutxienez 3 metroko zabalera librearekin.

f) Etxebizitzarako atarien ertzetik gutxienez 1m-ko tarte utzi beharko da.

g) Terraza barruan mugitzeko erraztasuna eskaini beharko da eta horretarako 2.1 eranskinean grafikoki adierazten diren distantziak errespetatu beharko dira:

- Igarobidearen bi aldetara eserlekuak badaude 1,40m-koa izan beharko du mahaitik mahairako tarteak.

-Igarobidearen alde bakarrean badago eserlekua 1,10m-koa izan beharko da mahaitik mahairako tarteak.

- Igarobidearen aldeetan eserlekurik ez badago 0,80m-koa izan beharko da mahaitik mahairako tarteak.

h) Denboraldi laburrerako edo luzerako baimenak dituzten establezimenduek terrazako elementu guztiak bide publikotik kendu beharko dituzte baimenaren indarraldia amaitutakoan.

i) Terrazako altzari guztiak lokalaren barruan gorde beharko dira. Toki falta dela-eta barruan gordetzerik ez duten eta hori behar bezala justifikatzen duten establezimenduek baimena eskatu

beharko dute horiek bide publikoan biltzeko; eskaera egitean haiek proposatu beharko dute horiek biltzeko okupatuko den azalera zein izango den eta udalak onartu edo beste kokapen bat proposatuko du.

j) Tasaren zenbatekoa dagokion zerga ordenantzaren arabera erabakiko da.

k) Fatxadari atxiki beharreko elementuak (hala nola toldoak eta erlaitzak) ezartzeko baimena emateko, hirigintza araudia betetzen den aztertuko da.

l) Ordenantzan ezarritako irizpide eta xedapen teknikoak betez gero, ordenantza honetan arautu gabeko baldintzak eta ezaugarriak dituzten espazioak okupatzeko eskariak ere ebatzi ahal izango dira.

11. artikulua. - Irisgarritasun eta zirkulazio baldintzak.

Jabari publikoko eta erabilera publikoko espazioetan terrazak jartzeko, espazio publikoetako irisgarritasunari buruzko araua eta ordenantza honetako baldintzak bete behar dira.

Irizpide orokor gisa, pasabide libreko zabalera bat ezartzen da oinezkoen zirkulaziorako (2m) eta beste bat ibilgailuen zirkulaziorako (3m).

Zabalera libre hori kalkulatzeko orduan, berau mugatzen duten oztopotzat hartuko dira hiri-altzariak, jardinerak, farolak, markesinak, posteak, hesiak eta espaloietan edo horien proiektzio bertikalean egon litekeen beste edozein elementu, alboko beste terraza batzuek hartzen duten espazioa barne.

Eskatzen den pasabide librea zabaldu egin daiteke oinezkoen edo ibilgailuen trafikoarekin lotutako arrazoi justifikatuengatik eta udal-zerbitzuen iritzi arrazoituagatik.

Era berean, 5 mahai baino gehiago dituzten terrazak gutxienez mahai irisgarri bat izan beharko dute. Mahai honen baldintzak 15. artikuluan eta II.I. Eranskinean xehatzen dira.

OINEZKOEN ZIRKULAZIO BALDINTZAK

Terrazen instalazioek oztoporik gabeko pasabide bat errespetatu behar dute, irisgarritasunari buruzko arauetan ezartzen dena (2 m-ko pasabidea, gutxienez). Hala, irisgarritasunaren oinarriko baldintzak betetzen dituztela bermatu beharko dute, baita urbanizatutako espazio publikoetara sartzeko eta horiek erabiltzeko bazterketarik ezerako oinarriko baldintzak ere, eta ezingo dute galarazi oinezkoentzako ibilbide irisgarrien baldintza orokorrak betetzea.

Irisgarritasunari buruzko arauetan ezarritako betekizun guztiak betetzea posible ez den hiri eremu finkatuetan soluzio alternatiboak baimen daitezke, ahalik eta irisgarritasun handiena bilatuz eta irisgarritasuna ez okerragotzearen irizpideari jarraituz. Terraza jartzeko lizentzian arazoitu eta baimendu behar dira soluzio horiek.

Kasu guztietan hurrengo baldintzak bete beharko dira:

a) Terrazako elementu bakar batek ere ezin du baimendutako eremua gainditu, ezta aurrez eskatutako oztoporik gabeko oinezkoen pasabidea inbaditu ere.

b) Oinezkoen erabilerako eremuetan dauden tabernen terrazek eta antzeko instalazioek hartzen duten gainazalak hautemateko modukoa izan behar du, eta saihestu egin behar dira ikusmen-degaitasuna duten pertsonentzat arrisku edo traba bat eragin dezaketen elementu edo egoerak. Hala, terrazen instalazioek eta antzeko instalazioek ezin diete kalterik eragin lehendik zeuden oinezkoentzako ibilbide irisgarriei, eta ezin dituzte egoera baztertzailak sortu espazio publiko

urbanizatuetara sartu eta horiek erabiltzeko. Ondorio horietarako, aipatutako baldintzak bermatzeko beharrezkoa balitz, terrazaren perimetroa babes-elementuen edo haize-babesen bidez mugatzeko betebeharra ezar dezakete terrazak jartzeko lizentziak.

IBILGAILUEN ZIRKULAZIORAKO BALDINTZAK

Terrazen instalazioak oztoporik gabeko pasabide bat errespetatu behar du ibilgailuen, larrialdi-zerbitzuen eta beste zerbitzu batzuen irisgarritasuna bermatzeko (3 m-ko pasabidea, gutxienez). Halaber, eraikinetako atarietarako, saltoki publiko edo pribatuetarako eta eraikinen larrialdi-irteeretarako sarbideak errespetatu behar dira, eta ibilgailuak sartzeko edo irteteko maniobrak egin daitezkeela ziurtatu behar da.

12. Artikulua. Euskararen erabilera sustatzeko neurriak.

Okupatutako eremuan jendearen eskueran eta bistan jartzen diren elementu guztiak euskaraz idatziko dira: menuak, prezioen zerrendak, kartelak, eskaintzen oharrak, arbeletako oharrak... Komunikazioa bermatzeko beste hizkuntzaren bat erabili behar bada, euskara lehenetsiko da.

Kontuan hartuta Hernaniko egoera soziolinguistikoa (% 62 euskalduna eta % 17 ia euskalduna, Hernaniko UEMAko kide) zerbitzari eta bezeroekiko harremanetan erabiltzen den hizkuntza nagusia euskara izatea sustatuko da, betiere euskararen eta gaztelaniaren ofizialtasunari buruzko araudian jasotakoari jarraiki.

13. artikulua. Baldintza espezifikoak.

13.1 I. motako espazioetarako. (Ibilgailu zirkulazioa duten kaleetako espaloiak).

a) Kontuan hartuko dira oinezkoen joan-etorrietarako pasabideak, joan-etorrien intentsitatea eta espaloia ezaugarriak (hiri altzaririk badagoen, zuhaitz-txorkoak dauden).

b) Terraza ezartzeko baimena emateko, 2,60 m-tik gorako zabalera izan behar du espaloiak. Edonola ere, okupazioak ezin du gainditu espaloia ezaugarriaren % 50.

2,60 m-tik beherako zabalera duten espaloietan, berriz, baldin eta zuhaitz-txorkorik badago, mahaiak eta aulkiak ezartzeko baimena eman ahal izango da, zuhaitz-txorkoen arteko espazioa aprobetxatzeko, betiere, gutxienez 2 m-ko pasabidea, bermatzen bada, edo aurrez zeuden elementuek lagatako pasabidea txikitzen ez bada.

Egituradun toldo mugikorrek ezartzeko baimena emateko, 2,50 m-ko oinezko pasabide bat bermatu behar da uneoro. Egituradun toldoen ezaugarriak 18. artikuluan eta II.III Eranskinean xehatzen dira.

c) Orokorrean terraza zintarriaren alboan ezarri behar da fatxadatik hurbileneko eremua oinezkoentzat libre utzita (2 m-ko pasabidea, gutxienez). Segurtasun-arrazoiak direla eta, zintarriaren eta terrazaren artean gutxienez 30 cm-ko tarte utzi behar da; eta bateriako aparkaleku baten ondoan badago, 60 cm-koa. Zintarriaren alboan aparkalekurik ez badago eta ibilgailuak pasatzen badira, alboko babes jarri behar da derrigorrez.

d) Zuhaitz-txorko ilarak edo hiri altzariak dituzten espaloietan edo etorbideetan, horiekin lerrokatuta egon beharko du terrazak.

e) 2 ilara mahai jarri ahal izango dira gehienez.

f) Terrazak fatxadaren aldean jartzen badira, arau orokorretan ageri bezala, etxeetarako atarietarako sarbidea 3 m-koa utziko da gutxienez eta atariaren mugatik 1 m urrundu beharko da fatxadaren norabidean.

g) Terrazak ezin har ditzake oinezkoen pasabide baten bi aldeak aldi berean.

h) Udalak soilik onartuko du terraza jartzea ibilgailuak igarotzen diren bide baten beste aldean salbuespen moduan, eta beste aukerarik ez dagoenean. Onartzen den kasuetan, 4 mahai jarri ahalko dira gehienez.

i) Hiri-altzarrietatik gutxienez 1,5m-ko distantzia tartea utzi beharko da . Gutxienerako tartea hau murriztu daiteke hiri altzariaren erabiltzaileak ez direla kaltetuak argudiatzen bada (adibidez, hiri-altzarirako sarbidea terraza ez beste aldean badago).

13.2 II motako espazioetarako. (Oinezkoen kaleak).

a) Zuhaitz-txorko ilarak edo hiri altzariak dituzten oinezkoen kaleetan, horiekin lerrokatuta egon behar du terrazak.

b) Arau orokor gisa, okupazioek 3 m-ko gutxienerako pasabide bat utzi behar dute libre -salbuespen gisa, 2,50 m-ko tartea- larrialdiko ibilgailuak igarotzeko eta garaje partikularretako sartu-irritenatarako. Espazio libre honetan balkoiak edo altura fatxadek eduki dezaketen beste edozein irtengune ere kontutan hartu beharko dira.

c) Terraza ezartzeko baimena emateko, 4 m-tik gorako zabalera izan behar du kaleak. Edonola ere, okupazioak ezin du gainditu espaloiareneko zabalera % 50.

4 m-tik beherako zabalera duten espaloietan, berriz, baldin eta zuhaitz-txorkorik badago, mahaiak eta aulkiak ezartzeko baimena eman ahal izango da, zuhaitz-txorkoen arteko espazioa aprobetxatzeko, betiere, gutxienerako 3 m-ko pasabidea -salbuespen gisa, 2,50 m-ko tartea-, bermatzen bada edo aurrez zeuden elementuek lagatako pasabidea txikitzen ez bada.

d) Kalean parez pare dauden bi terrazek topo egiten badute, eta gutxienerako pasabideak babestu beharra badago, udal-zerbitzuek erabakiko dute horien banaketa, oinezkoen trazatuari oztoporik jarri gabe.

e) Terrazak fatxadaren aldean jartzen badira, etxeetarako atarietarako sarbidea 3m-koa utziko da gutxienez eta atariaren mugatik 1m urrundu beharko da fatxadaren norabidean, arau orokorretan ageri bezala.

f) 2 ilara mahai jar ahal izango dira gehienez

g) Hiri-altzarrietatik gutxienez 1,50 m-ko distantzia tartea utzi beharko da. Gutxienerako tartea hau murriztu daiteke hiri altzariaren erabiltzaileak ez direla kaltetuak argudiatzen bada (adibidez, hiri-altzarirako sarbidea terraza ez beste aldean badago).

13.3 III. motako espazioetarako. (Plazak eta oinezkoen beste espazio batzuk).

Terrazak plaza eta espazio libreetan jartzeko eskakizunak aztertuko dira kasuan kasuko ezaugarrien arabera eta honako baldintza hauen arabera ebatziko dira:

a) Terrazak fatxadaren aldean jartzen badira, etxeetarako atarietarako sarbidea 3m-koa utziko da gutxienez eta atariaren mugatik 1m urrundu beharko da fatxadaren norabidean, arau orokorretan ageri bezala.

- b) Egoteko erabilera eta oinezkoen zein ibilgailuen zirkulazioa bermatuko dira.
- c) Udal-ekipamenduak errespetatuko dira, hala nola lorategiak, haurren parkeak eta hiri-altzariak, oro har; gutxienez 1,50 metroko zabalera librea utziko da.
- d) Saltokiak terraza jarri nahi duen plazan edo espazio librea izan behar du fatxada.
- e) 4 mahai ilarako terrazak ezarri ahal izango dira.
- f) Terrazen gehieneko okupazioa, espazioaren %25-a izango da (udal-ekipamenduak, bideak... kontuan hartu gabe).
- g) Espazioaren ezaugarriak direla eta banaketa proportzionala egin beharko balitz, aintzat hartuko da saltokiaren barruan dagoen publikoari irekitako espazioa, hau da, lokalaren barruko azaleraren proportzio zuzenean jarri ahalko da kanpoko terraza. Kasu guztietan aintzat hartuko da espazioaren urtaroko izaera, eta okupatuko espazioa inoiz ez da izango libre dagoen espazioaren % 25 baino handiagoa (udal-ekipamenduak, bideak... kontuan hartu gabe).
- h) Terraza bat baino gehiago dauden hiri eremu homogeneoetan, terraza guztietan altzari berdinak jartzeko eska dezake udalak. Hala, denak batera eta harmonia estetikoko berariazko baldintzekin jartzea azter dezake. Ondorio horretarako, eraginpeko ostalaritza-saltokiek udalari aurkeztu beharko dizkiote haien kokapen eremuari dagozkion proposamena edo proposamenak, banaka edo taldean. Udalak erabakiko du, saltoki horiekin batera adostuta, zer proposamen egokitzen den ongien interes orokorretara.

Adostasun batera iritsi ezean, udalak ahalmena izango du aipatutako hiri-altzariei dagozkien baldintza tekniko eta estetiko egokienak zein diren erabakitzeko.

- i) Halaber, terraza bat baino gehiago dituzten plaza edo espazio libreen kasuan, udalak erabaki dezake zein den terrazak jartzeko kokapenik egokiena. Horretarako, espazioaren ezaugarriak hartuko ditu kontuan (urtaroko izaera, oinezkoen bidea, ibilgailuen zirkulazioa, etab.).

13.4. IV motako espazioetarako. (Arkupeak)

Eremuaren jabearen baimen espresua aurkeztzen bada (jabeen erkidegoa, udala,...) terraza jartzeko eskaria egin ahal izango da segidako baldintzak betez:

- a) Oinezkoentzako 2 m-ko pasabide librea bermatu beharko da.
- b) Ezingo du arkupearen zabalaren % 50 baino gehiago okupatu.
- c) Ezingo ditu zutabetarte guztiak okupatu oinezkoen fluxu naturalak ez oztopatzeko eta arkupeetarako sarbideak uzteko.
- d) Terraza beste leku batean jarri ezin bada, kasuan kasu aztertuko da aurreko puntuetan ezarritako baldintzen malgutasuna. Udal teknikariek erabakiko dute zein kasuetan aplikagarri izan daiteke malgutasun hori, interes orokorra irizpide gisa erabiliz.

13.5. V motako espazioetarako. (Baimen bereziko espazioak).

TERRAZA AMANKOMUNAK

Udalak terraza amankomunak jartzeko baimen bereziak emango ditu baldintza hauen pean:

- a) Terraza amankomunak jartzeko eremuak tabernariak proposatuko dituzte. Udalaren esku egongo da eremu horietan terraza jartzeko baimena ematea.
- b) Espazio bereizi hauetan mahaiak jarri nahi dituzten establezimenduek modu koordinatuan egin beharko dute haien proposamena.
- c) Eremu hauetako terrazek ere ordenantza honetako arautegia bete beharko dute, lokalaren gertutasuna eta fatxadaren proiektzioaren baldintzak izan ezik.
- d) Terraza amankomuna elkarbanatuko duten establezimenduen artean modu proportzionalan banatuko dira terrazako mahaiak eta horren araberako tasa ordainduko dute.
- e) Terraza lokalaren jabearen ikus-eremuan egongo ez denez, bizikidetzara-arauek errespetatzen direla bermatzea jabearen eskumena izango da.

III.II. ATALA. INSTALATUKO DIREN ELEMENTUEN EZAUGARRIAK

14. artikulua. Mahai-modulu aniztasuna.

I. moduluak: mahai biribila edo karratua, 0,80 m-koa

- 4 aulkirekin 2x2 m-ko gainazala hartzen duena.
- 3 aulkirekin 1,40x2 m-ko gainazala hartzen duena.
- 2 aulkirekin 0,80x2 m-ko gainazala hartzen duena.
- 2 aulkirekin 0,60x2 m-ko gainazala hartzen duena.

II. moduluak: alde bateko mahai laukizuzena, 1 m x 0,40 m-koa

- 1 aulkirekin 1x1 m-ko gainazala hartzen duena.
- Mahaira begirako 2 aulkirekin 1x1,10 m

Modulu berezia:

Aukera egongo da mahai eta forma ezberdinetako terrazak proposatzeko eta terrazetan jarri ahal izango dira, beti ere segidako baldintzak betez gero:

- Udalak proposamena onartzea (Kasu bakoitza banan-banan aztertuko du, espazioaren forma eta azalera kontuan hartuta).
- Pertsona bakoitzaren okupazioa eta mahaiarenak, okupazio osoa emango duen errektangulu baten barruan aurkeztea. Errektanguluaren neurriak adierazita egon beharko dute.
- Pertsona bakoitzaren okupazioa 0,60m zabal eta 0,60m sakonekoa izatea gutxienez.

II.II. Eranskinean moduluak grafikoki azaltzen dira.

ITXURA – MATERIALITASUNA

Mahai eta aulkietarako, aluminioa eta egurra lehenetsiko dira, eta kolore neutroak. Inola ere ezingo da erabili dagokien markaren kolore biziko bereizgarriak dituzten publizitateko altzariak. Mahaiak eta

aulkiek gomazko babesgarriak izan behar dituzte hanketan, ahal den neurrian zaratak arintzeko eta bizilagunei ahalik eta traba gutxien eragiteko. Aise pilatzeko modukoak izango dira, bilduta daudenean ahalik eta espazio gutxien okupa dezaten.

15. artikulua. Mahai irisgarriak

5 mahai baino gehiago dituzten terrazak gutxienez mahai irisgarri bat izan beharko dute. Ezaugarri hauek izango dituzte (II.I. Eranskinean grafikoki adierazi direnak):

- a) Mahai baxua.
- b) Aldeetako 3tan 1,20m-ko pasabide librea (aulkiek ere okupatu ezingo dutena) izango du. Mahai zirkularren kasuan karratu bat zirkunskribatuko zaio.
- c) Aniztasun funtzionala duten pertsonak lehenetsuna izango dute mahai hauek erabiltzerako orduan.
- d) Mahaiaren gainazalean mahai irisgarria dela adierazten duen ikur bat ezarriko da.

ITXURA – MATERIALITASUNA

Gainerako mahaien antzeko estetika eta materialak izan beharko ditu. Hori horrela, aluminioa eta egurra lehenetsiko dira, eta kolore neutroak. Inola ere ezingo da erabili dagokien markaren kolore biziko bereizgarriak dituzten publizitateko plastikozko altzariak. Mahaiek eta aulkiek gomazko babesgarriak izan behar dituzte hanketan, ahal den neurrian zaratak arintzeko eta bizilagunei ahalik eta traba gutxien eragiteko. Aise pilatzeko modukoak izango dira, bilduta daudenean ahalik eta espazio gutxien okupa dezaten.

16. artikulua. Alboetako babesak (manparak edo loreontziak).

Segurtasun- eta gatazka-arrazoiengatik, derrigorrezkoak izango dira alboetako babesak kasu hauetan: terraza ibilgailuen zirkulazioa duen bide batek mugatutako zintarriaren alboan kokatuta dagoenean eta babesteko barandarik eta aparkatutako ibilgailurik ez dagoenean. Era berean, udal-zerbitzu teknikoek erabaki ahal izango dute alboetako babesak beharrezkoak direla terrazaren eta ingurunearen ezaugarriak kontuan hartuta.

Gainerako kasuetan terrazaren titularrak berak ere hauek jartzeko eskaria egin dezake baldin eta ez badaukarte handik igarotzen direnentzako arriskurik, ezta bide publikoaren kalte edo gorabeherarik ere. Dena dela udal teknikariek aztertuko dute kasua erabakia hartu aurretik.

GUZTIETARAKO

- a) Beti terrazaren baimendutako eremuaren barruan kokatu beharko dira.
- b) Kokapena erabakitzerakoan oinezkoen sarbide eta joan-etorri beharrak lehenetsi behar dira.
- c) Berariazko lizentzia beharko da horiek jartzeko.

MANPARAK

Terraza mugatzeaz gain, haizetik babesteko ere balio dezakete. Ezaugarriak hauek izan behar dituzte:

- a) Ezingo dira zorura lotu.

- b) Gardenak izan beharko dira.
- c) Egonkorrak eta jarraituak izan behar dute, ertz bizirik gabeak, euskarrietara behar bezala ainguratuak, mugitzea nahiz iraultzea ekiditeko.
- d) Terrazak hartzen duen eremuaren alde bat estali gabe utziko da gutxienez.
- e) Luzera 2,50 m-koa izango da gehienez, eta 1 m eta 1'80 m artekoa, berriz, altuera.
- f) Hiri-altzariekin harmonia estetikoa gorde behar du ahal dela, eta kolore neutroak erabiliko dira (zuria, krema kolorea, kolore metalizatuak).
- g) Behin ordutegia amaituta, manpara eta hauen euskarriak lokalaren barrura sartu behar dira eta, posible ez bada, aurrez baimendutako leku batean jar daitezke, oinezkoen eta ibilgailuen igarotzeari kalterik eragiten ez dioten leku batean (adibidez, lehendik dauden hiri-altzarien lerro berean).

LOREONTZIAK

Terraza mugatzeaz gain, haizetik apur bat babesteko eta naturaren presentzia areagotzeko ere balio dezakete. Honako ezaugarri hauek izan behar dituzte:

- a) Ezingo dira zorura lotu.
- b) Loreontzia eta landarea kontuan hartuta gehienez 1,20 m-ko altuerakoak izan beharko dute eta gehienezko luzera 2,50 m-koa.
- c) Hiri-altzariekin harmonia estetikoa gorde behar du ahal dela, eta kolore neutroak erabiliko dira (zuria, krema kolorea, kolore metalizatuak).
- d) Behin ordutegia amaituta, orokorrean, loreontziak lokalaren barrura sartu behar dira eta, posible ez bada, aurrez baimendutako leku batean jar daitezke, oinezkoen eta ibilgailuen igarotzeari kalterik eragiten ez dioten leku batean (adibidez, lehendik dauden hiri-altzarien lerro berean).

17. artikulua. Eguzkitakoak.

Ez da behar berariazko lizentziarik horiek jartzeko. Eguzkitakoek ondorengo ezaugarriak izan behar dituzte:

- a) Oihalezkoak, marrazkirik gabeak eta kolore bakarrekoak izan behar dute. Ezingo dira kolore deigarriak erabili.
- b) Ezingo dute gainditu terrazaren hedadura, oinplanoko proiektzioan, ezta inolako itxitura bertikalik eduki ere.
- c) 2,20 m-ko altuera librea utzi behar dute gutxienez.
- d) Euskarri finkorik gabe eta zoruari lotu gabe ezarri behar dira, aise garraiatzeko moduko kontrapisuetan bermatuta.

18. artikulua. Toldoak.

Ostalaritza-saltokien kanpoan jarritako toldoak bertako jarduerarekin lotuta daudela ulertzen da. Terraza babestea da horien funtzioa eta, horregatik, ordenantza honetan arautuko dira fatxadan ainguratutako edo finkatutako toldoak eta egitura mugikorrek dituzten toldoak.

Estalkiaren materialak oihal erakoa eta leuna izan behar du, eta euskarriak altzairuzkoa (herdoilgaitza edo burdinurtuzkoa). Biek nolabaiteko harmonia eta estetika mantendu behar dute hiri-altzariekin; kolore neutroak erabili behar dituzte (zuria, krema, metalizatua), kolore bakarra izan behar dute, inguruarekin bat etorri behar dute kromatikoki eta ezin da inola ere kolore deigarririk erabili.

SALTOKIAREN FATXADAN AINGURATUTAKO EDO FINKATUTAKO TOLDOAK

Baldintza hauen arabera baimenduko dira:

- a) Puntu bakar batean ere ez dira irtengo espaloia zabalera baino harago eta 4m baino harago.
- b) Hedadura guztian zehar, 2,50 metro baino garaiera altuagoan jarri behar dira, espaloia edo parean duen espazioaren lur-arrasetik neurtuta; altuerak ezin du aipatutakoa baino txikiagoa izan puntu bakar batean ere. Altuera horren azpitik, euskarriak eta toldoak zabaltzeko eta biltzeko behar diren gainerako elementuak bakarrik jar daitezke, fatxadako lerrotik gehienez ere 0,20 m irtenda.
- c) Ezin izango dituzte lurrean bermatzeko elementurik izan.
- d) Berariazko lizentzia beharko da horiek jartzeko.
- e) Jardueraren ordutegia amaitu ondoren toldoa jaso beharko da.

EGITURADUN TOLDO MUGIKORRAK

Gutxieneko baldintza hauek bete beharko ditu hiri paisaian ahalik eta inpaktu txikiena izan dezan:

- a) Okupatzen duen gainazalaren inguruan kokatutako toldo mugikor eta desmontagarriak ezin dira ainguratu ez zorian, ez fatxadan.
- b) Estali beharreko azalerak ezin du baimendutakoa baino handiagoa izan, gutxieneko garaiera libreak ezin du 2,50 m baino txikiagoa izan eta ez du itxitura bertikalik izango. Gehienezko altuera 3,50 m-koa izango da eta beti inguruko eraikinetako lehen solairuko forjatuaren goiko aldearen azpitik geratu behar dute.
- c) Egiturak eta estalkiak fatxadatik 3 m bereizita egon behar dute, gutxienez.
- d) Behin ordutegia amaituta, egitura lokalaren barrura sartu behar da eta, posible ez bada, aurrez baimendutako leku batean jar daiteke, oinezkoen eta ibilgailuen igarotzeari kalterik eragiten ez dion leku batean (adibidez, lehendik dauden hiri-altzarien lerro berean).
- e) Berariazko lizentzia beharko da horiek jartzeko.

19. artikulua. Garbitasunerako elementuak.

Erretzen den mahai guztietan hautsontziak egotea bermatu beharko da.

20. artikulua. Informazio moduluak.

Ez da behar berariazko lizentziarik horiek jartzeko. Ezaugarri hauek izango dituzte:

- a) Gehienez 0,70 m x 1,20 m neurtu ahalko dute.
- b) Finkatze-elementuak izango dituzte erabiltzen diren bitartean mugitu eta irauli ez daitezten.
- c) Informazioa euskaraz azaldu beharko dute lehenetsuz.
- d) Arbela motakoak zein informazioa paperean itsatsia duten panelak izan daitezke
- e) Debehatuta dago publizitatea jartzea.

21. artikulua. Bestelako elementu osagarriak eta debehatutakoak.

- a) Ez da zerbitzurik eskaini ahalko duen barrarik onartuko.
- b) Ez da inolako gordailu edo armairurik jartzea baimenduko.
- c) Ez da inongo kasutan terrazen eremua artifizialki berotzeko edo freskatzeko sistemarik baimenduko.
- d) Debehatuta dago baimendutako espazioan edari eta izozkietarako hozkailuak, litxarreriak, jolasak edo opariak edukitzea.
- e) Ez dira terraza eremuan ikus-entzunezko ekipoak baimenduko (irradi, telebista nahiz musika sortzeko inolako elementurik ezartzea).

IV. TITULUA. SALGAI DAUDEN PRODUKTUEN ERAKUSLEKUAK JARTZEA.

IV.I. ATALA. INSTALAZIOEN BALDINTZAK

22. artikulua. Salgai dauden produktuaren erakuslekuaren ezaugarri teknikoak.

Baimena eman ahal izango da produktuak erakuslekuaren bidez bide publikoan erakutsi edo saltzeko, jabari pribatua eta erabilera publikoa duten lurzoruetan edo jabari eta erabilera publikoko espazioaren inguruko jabetza pribatuko lurzoruetan, betiere honako araudi honetara egokituz gero eta arau hauek betez gero:

- a) Erakuslekuak behar bezala margotuta eta korrosiotik babestuta egongo dira, guztiz garbi. Gurpilak izango dituzte alde batetik bestera eramateko, eta beharreko finkatze-elementuak izango dituzte erabiltzen diren bitartean mugitu eta irauli ez daitezten. Debehatuta dago lurrean nahiz fatxadaren inolako euskaririk jartzea. Erakuslekuaren egiturek ez dute ertz zorrotzik izango.
- b) Erakuslekuak eraikinaren fatxadari atxikita instalatuko dira, eta luzerak ezingo du gainditu jardura duen lokaleko fatxadaren luzera, eta etxebizitzaren sarbiderako 3 m-ko pasabidea
- c) Ibilgailuak dabiltzan kaleetako espaloietan 2 metroko zabalera libreko pasabidea bermatuko da eta erakuslekuaren zabalera kokatzen diren espaloiko zabalaren herenekoa izango da eta, gehienez, metro bateko zabalera izango du.
- d) Oinezkoen kaleetan eta plazetan 3 metroko zabalera libreko pasabidea bermatuko da. Erakuslekuak, gehienez, metro bateko zabalera izango dute.

- e) Oinezkoen zirkulazioa eta hiri-altzarien erabilera era egokian bermatzeko, kasu bakoitzean bete beharreko zabalera librean ezingo da egon hiri-altzaririk edo bestelako elementurik.
- f) Arkupe edo ataripe gisako pasabide estalietan 2 metroko zabalera libreko pasabidea bermatuko da.
- g) Erakusten diren produktuak, lurretik 0,50 metroko altueran jarriko dira gutxienez.
- h) Erakuslekuek eta salgaiek osaturiko multzoa ez da 1,60 metrotik gorakoa izango.
- i) Debekatuta dago bide publikoan salmentako produktuak pisatu, neurtu edo kobratzeko elementuak jartzea.
- j) Erakuslekuak establezimenduaren kanpoaldean eduki ahal izango dira merkataritza-ordutegian. Ordutegi hori amaitzean erretiratu egin beharko dira, eta okupatzen zuten bide publikoa garbi utzi.
- k) Ez da onartuko elikagaiak banatzeko kaxak erakusleku gisa erabiltzea.
- l) Erakutsi beharreko produktuak elikagaiak badira, kaxa motako erakusleku bereziak erabili beharko dira, behar bezala antolatuta daudenak.

23. artikulua. Merkataritza jardueren elementu osagarrien ezaugarriak.

Arau hauek bete behar dira:

- a) Dekorazio elementu eta kartelak beharrezko finkatze-elementuak izango dituzte erabiltzen diren bitartean mugitu eta irauli ez daitezten. Debekatua dago lurrean nahiz fatxadaren inolako euskaririk jartzea. Dekorazio elementu eta kartelen egiturek ez dute ertz zorrotzik izango.
- b) Dekorazio elementuak edo kartelak fatxadaren alboan jarriko dira. Lokalaren fatxadaren luzeran zehar jar daitezke, eta etxebizitza sarbiderako 2 metroko sarbidea bermatu beharko da.
- c) Ibilgailuak dabiltzan kaleetako espaloietan 2 metroko zabalera libreko pasabidea bermatuko da eta elementuen zabalera, gehienez, 0,60 metrokoa izango da.
- d) Oinezkoen kaleetan eta plazetan 3 metroko zabalera libreko pasabidea bermatuko da. Dekorazio-elementuek eta kartekek, gehienez, 0,60 metroko zabalera izango dute.
- e) Oinezkoen zirkulazioa eta hiri-altzarien erabilera era egokian bermatzeko, kasu bakoitzean bete beharreko zabalera librean ezingo da egon hiri-altzaririk edo bestelako elementurik.
- f) Arkupe edo ataripe gisako pasabide estalietan ere 2 metroko zabalera libreko pasabidea bermatuko da, jabari publikokoak zein pribatukoak izan.

V. TITULUA. BIZILAGUNEK ATARIETAN EGOTEKO ELEMENTUAK JARTZEA

24. artikulua. Oroitarazpena.

Artikulu honen xedea, jendeak irabazi asmorik gabeko erabilera pertsonalerako kaleko espazioan aulki eta mahaiak jar ditzakeela gogoratzea da.

Bestelako ekintza edo ekitaldiak antolatzeke ekintzari dagokion araberako baimen eskaera egin beharko du udalean.

VI. TITULUA. BAIMEN ADMINISTRATIBOAK.

25. artikulua. Baldintza orokorrak.

Edozein terraza mota instalatu ahal izateko, aurrez, baimen administratiboa beharko da, zeina udal-lizentzia moduan emango baita.

Lizentziak emango dira, jabetzako eskubidea errespetatuta eta beste pertsonen eskubideari kalterik egin gabe. Hala, onuradunak ezingo du udal-lizentzia argudio gisa erabili bere jarduna aurrera eramatean izan dezakeen erantzukizun zibila edo penala salbuesteko edo murrizteko.

Eskumena duen udal organoak instalazioa bide publikotik ken dadin agindu ahalko du, baldin eta beharrezkoa bada trafikoarekin, urbanizazioarekin, obra publikoekin edo interes orokorreko beste edozein inguruabarrekin lotutako arrazoiengatik.

26. artikulua. Baimena emateko prozedura.

26.1. Eskaerak.

Interesatuak alkateari zuzendutako eskaera aurkeztu beharko du udaleko Erregistro Nagusian (aurrez aurre edo on-line), artikulu honetan adierazitako dokumentazioarekin batera:

a) Eskaera orria (IV. eranskina) egoki beteta eta sinatuta.

b) Okupazioaren kokalekuaren planoak, okupatuko den espazioaren eta oinezkoen zirkulaziorako nahiz lokal eta atarrietara sartzeko espazio libreen zehaztapenarekin; halaber, oinezkoen pasabideetara, larrialdiko irteeretara, autobus eta taxien geltokietara, zintzilikarioak dauden puntuetara edo inguruan izan daitekeen edozein elementura (trafiko-seinaleak, zuhaitzak, zutabeak, bankuak, hiri-altzariak, e.a.) dauden distantziak azaldu beharko dira.

Era berean, okupazio eremuaren barnean udal zerbitzuko estalduren arketak (ura, saneamendua, gasa...) baleude, hauek ere planoan adierazi beharko dira.

Planoa erraz irakurtzeko modukoa eta argia izan beharko da eta uda eta negu denboraldiko proposamenak desberdinak badira bi plano aurkeztu beharko dira.

c) Gutxienez 1:100 eskalako planoak edo krokis kotaduna (kartografia ofizialeko oinaren arabera), zeinetan zehaztuko baitira jarri nahi den terraza-eredua, kokalekua, jarri nahi diren mahaien kopurua eta modulua, mahai arteko pasabide, lokalaren fatxadaren luzera eta baldin baleude terrazako gainerako elementuen antolaketa (ad: albo-babesak, eguzkitakoak, mahai irisgarriak). Terrazaren ordutegia bukatu ondoren terrazako elementuak pilotatzeko azalera okupatzea beharrezkoa baldin bada, hori ere zehaztu beharko da planoan.

Terrazak guztira hartzen duen okupazio azalera kolore desberdinduko errektangulu baten bidez garbi adierazi beharko da eta azalera honek barnebildu beharko ditu elementu osagarriak ere.

Planoa edo krokisa erraz irakurtzeko modukoa eta argia izan beharko da eta uda eta negu denboraldiko proposamenak desberdinak badira bi plano edo krokis aurkeztu beharko dira.

d) Alboko lokalek baimena eman izanaren ziurtagiria, baldin eta halakorik behar bada.

e) Lokalaren fatxadaren argazkia, baita albokoena ere hauen parean kokatuko bada terraza.

f) Estalki egitura balego, hau ageri den kokalekuaren eskalako plano eta altxaera kotadunak eta egitura sistemaren xehetasunak (nola jasoko den etab.), teknikari eskudunaren sinadura duen ziurtagiriarekin eta azalpen-memoriarekin batera.

g) Albo-babesak baleude hauen deskribapena, neurriak, katalogoak, argazkiak.

h) Terrazako instalazioak eragin ditzakeen kalteak estaltzen dituen erantzukizun zibileko aseguruaren kopia.

26.2. Baimena ematea.

Eskaera ordenantza honetan eskatutako moduan egin ondoren, eta egoki iritzitako txosten teknikoak aurkezturik, udal-organo eskudunak ebatziko du baimenari buruz, legez ezarritako epean, lizentzia ukatuz edo emanez.

Bide publikoaren okupazioari buruzko txostena egiten duten teknikariek aztertuko dituzte egindako eskaerak, aurkeztutako dokumentazioarekin batera, eta, kasua hala bada, falta den dokumentazioa aurkez dadin eskatuko dute. Hori egitean, eskatzaileari jakinaraziko diote ez zaiola baimenik emango adierazitako dokumentazioa aurkeztu ezean. Bestela, egindako eskaera onar dezakete. Kasu horretan, okupazioak bete beharreko baldintzak zehaztuko dituzte, eta plano batean adieraziko dituzte gehienez okupa daitezkeen eremuak -terraza-ereduaren arabera-, kokalekua, mahai-moduluak eta eskatutako albo-babesak.

Lizentziaren dokumentuan jasoko dira okupazioaren baldintzak, betebeharrak eta gehieneko mugak. Okupazioaren kokaleku zehatza adierazten duen planoak aurkeztuko zaio interesatuari. Horrez gain, gehieneko azalera eta baimendutako mahai moduluak, oinezkoen zirkulaziorako pasabideak eta, ordenantza honen arabera, okupazio bakoitzak bete beharreko gainerako baldintzak zehaztuko dira.

Udal-organo eskudunak terrazak jartzeko lizentzia ukatu ahalko du, baldin eta interes publikoak hala eskatzen badu, trazadura, kokapena, bide-segurtasuna, obra publikoak edo egoki iritzitako beste edozein arrazoi dela eta.

Lizentzia ematea egokitzat jotzen ez bada edo baimena ematean aldaketaren bat egin beharko balitz, udalak audientzia eman beharko dio eskatzaileari, hark egoki iritzitako alegazioak egin ahal izan ditzan.

Baimenak gehieneko okupazio-espazio baterako eman ahalko dira, eta urtebeteko eperako (urtearen amaieran, izan terrazaren titularraren aldetik, nahiz udalaren aldetik, inolako aldaketarik komunikatzen ez bada automatikoki baimena beste urte betez luzatuko da), aldi baterako eta besterendu ezineko izaerarekin (banan-banan). Hala eta guztiz ere, udalak baimena atzera bota ahalko du, baimena emateko inguruabarrak desagertuz gero edo, baimena emateko unean gertatu izan balira, lizentziari uko egitea eragingo zuketzen inguruabarrak sortuz gero.

Baimenaren titularrak egoki irizitako moduan erabili ahalko du espazioa (baimendutako mugen barruan), okupazio azalerari dagozkion tasa ordainduz, kontuan izanik baimendutako okupazio maximoa, terraza jarri nahi duen denbora edota urte-sasoa.

Gerta daiteke terrazak jartzeko baimena bai baina estalki egiturak jartzekorik ematerik ez izatea, establezimenduaren kokapena edo ordenantza hauetan azaldutako irizpenak kontuan hartuta.

26.3. Baimena etetea.

Baimenak eten egin ahalko dira, kalte-ordainik jasotzeko aukerarik gabe, honako kasu hauetan:

a) Zigorak jartzeagatik.

b) Interes publikoagatik, obrak egin behar direlako, baimendutako aldamiok jarri behar direlako edo larrialdiko egoerengatik terrazak okupatutako espazioak libre geratu behar duenean.

Baimenak bere efikazia errekuaratuko du etendura justifikatu duten inguruabarrak desagertzean, ebazpen administratibo baten beharrik gabe.

Interes publikoagatik baimena eteten bada, tasak proportzionalki itzultzeko ebazpena emango da, edo aldi baterako beste espazio bat ezarriko da –erabakia hartzeko baldintzek eragiten ez dutena–, ordenantza honetan adierazitako baldintzetan.

Terraza adskribatua duen ostalaritzako establezimenduaren baimena iraungitzen edo eteten bada, edota edozein arrazorengatik ixten bada, automatikoki etengo da terrazaren baimena ere.

c) Lizentzia jaso eta bi hilabeteko epean tasa ez ordaintzeagatik.

26.4. Baimenen transmisioa.

Baimenak ezin dira transmititu modu independentean, terrazaren baimena adskribatuta dagoen jarduerarekin lotuta baitago.

Ostalaritzako establezimenduko jardueraren titulartasun transmisioa eta terrazarena modu berezian jakinarazi beharko dira eta bakoitzarentzat aparteko eskaria egin beharko da.

Udalak jardueraren titulartasun transmisioa baimentzen badu ere terrazarena ukatu dezake edo zuzenketak egiteko eskatu. Aldiz, alderantziz ez da inoiz posible izango, terraza lizentzia eskualdatzeko baimena lortzeko jardueraren titulartasun transmisioa frogatu beharko baitu lehendabizi.

Ostalaritzako establezimenduko jardueraren titulartasuna aldatu dela jakinarazten ez bada, berriz, baimenaren titularrak dituen erantzukizunetara lotuak geratuko dira bi subjektuak.

VII. TITULUA. BETEBEHARRAK.

27. artikulua. Instalazioaren titularrarenak.

Dagokion tasa ordaintzea, udalak baimendutako okupazioaren barruan jarri nahi dituen mahaien kopurua, establezimendu lokalaren eta terrazaren arteko proportzioa eta egituradun toldo mugikorren instalazioa kontuan izanda.

Baimendutako eremuan, ordaindutako tasari dagokion elementuen kopurua eta modulu-motak jartzea, entregatutako planoan baimendu eta adierazten diren mugak errespetatuz.

Ostalaritzako establezimenduak zerbitza ditzakeen janari eta edariak zerbitzatzeko, non eta ez dagoen elikagaiak manipulatzeko zerbitzua mugatzen duen ebazpen espresurik.

Udal-zerbitzuek ikusteko eta eskuratzeko moduan izatea baimena bera eta dagokion planoak. Lokalaren fatxadan jarri beharko da, kanpotik ikusten den leku batean.

Terraza jartzeko finkaturiko ordutegia betetzea.

Terraza eta haren elementu osagarri guztiak kentzeko obligazioa betetzea, ixteko ordua iristean. Baimenaren epea amaitzean, itxiturak kentzeko obligazioa betetzea.

Baimendutako ordutegia amaitzean terrazan dauden pertsonak terrazatik joan daitezzen arduratzea.

Udalak instalazioaren kontserbazioko eta mantenuko egoera ikuska dezan uztea, okupazioaren baldintzak betetzeko egin beharreko konponketak edo bestelako ekintzak zehazteko.

Instalazioak baimendutako espazioan edo jarduera martxan dagoen bitartean sortutako kalte guztien gaineko erantzukizuna hartzea. Titularrak bere kontura eta modu egokian konpondu beharko ditu kalte horiek, udaleko teknikarien gainbegiradapean.

Izaera orokorreko betebeharrak eta ordenantza honen aplikaziotik eratorritakoak albo batera utzirik, instalazioaren titularrak obligazioa izango du okupatzeko baimendutako lurzorua nahiz instalazioa bera eta haren elementu osagarriak garbi, seguru eta txukun mantentzeko. Beraz, aldian behin erratza pasa eta garbitu egin beharko du, eta horretarako beharrezkoak diren baliabideak izan beharko ditu (gaikako bilketarako edukiontzia, hautsontziak, etab).

Jardueraren titularrak gainerako bizilagunen lasaitasunerako eskubidea errespetatu beharko du. Hortaz, ez du onartu behar iskanbilarik, liskarrik edo zaratarik instalazioan; bereziki, 23:00etik aurrera eta 9:00ak baino lehen.

Ordenantza honetan ezarritako betebeharrak betetzearen berme gisa erabiliko den fidantza ordaintzea. Fidantza hori, 300 eurokoa izango da eta lizentzia eskuratu aurretik jarri dela justifikatu beharko da.

28. artikulua. Udalarenak.

Okupazioa finkatzea eta zehaztea, kokalekuaren plano bat aurkeztuz. Plano horretan zehaztuko dira okupa daitezkeen azalera, mahaien kopurua eta moduluak, albo-babesak eta oinezkoen zirkulaziorako pasabideak. Udalaren dokumentu horretan, instalazioaren irekitzeko eta ixteko ordua zehaztuko da.

Baimenaren titularraren eskura jartzea okupa ditzakeen lursailak, baimena notifikatzen den egunaren hurrengotik.

Espedienteetan audientziako tramitea ematea, eta eskatzaile bakoitzari hartutako erabakiak notifikatzea.

Baimena alde aurretik eteteagatik bide publikoaren okupazioa amaitzean, dagokion zenbateko proportzionala itzultzea.

Ikuskapena egitea, eta instalazioa aurkezturiko dokumentazioarekin eta proiektuarekin eta baimena emateko baldintzekin bat datorrela egiaztatzea.

VIII. TITULUA. ZEHAPEN ERREGIMENA

29. artikulua. Ikuskapenak.

Udaltzaingoak eta udal-lurren erabileraren ondare-kudeaketa esleitu duen udal-zerbitzuak zaindu eta kontrolatu behar dute ordenantza hau betetzen den.

Udaltzaingoak, edozein pertsona fisikok edo juridikok eta edozein entitatek salatu ahalko ditu, udalaren aurrean, ordenantzaren edo baimenaren baldintzen urraketak. Horretarako, salaketa-idatzi bat aurkeztu beharko da, egiaztatzeko beharrezkoak diren datuak aurkeztuta eta Administrazio Publikoen Prozedura Administrazio Komunari buruzko 39/2015 Legearen 66. artikuluan jasotako xedapenak beteta.

30. artikulua. Udal lizentziarik ez duten instalazioak.

Udal-organo eskudunak, aurrez interesatuari audientziako epe bat eman ondoren, berehala kendu ahalko du udal-lizentziarik gabe jarritako terraza, eta udal-zerbitzuen biltegian utzi, hargatik eragotzi gabe hurrengo artikuluen arabera aplikatu beharreko zehapenak.

Derrigorrezko udal-lizentziarik gabe jarritako instalazioa kentzean, dagokion diruzko zehapena ezartzeaz gain, establezimendua desgaituta geratuko da ordenantza honetan araututako baimenak etorkizunean lortu ahal izateko, gehienez 2 urtez.

31. artikulua. Arau-haustea.

Arau-haustek izango dira lizentzia emateko udal-ebazpenean jasotzen diren baldintzen kontrako edo, oro har, ordenantza honetan xedaturikoaren kontrako ekintza edo ez-egite guztiak.

Arau-haustek arinak, larriak edo oso larriak izan daitezke.

31.1. Arau-hauste arinak.

- a) Lizentzian baimendutako espazioa ez den beste espazio bat okupatzea.
- b) Moduluak emandako planoan baimendutako kokalekutik kanpo jartzea.
- c) Instalaturako mahai, aulki eta bestelako elementuek lizentzian jasotako kopurua gainditzea, % 20 baino portzentaje txikiagoan. Neurriz kanpoko kopurua zehazteko, elementuek okupatzen dituzten azalerak hartuko dira kontuan.
- d) Baimena eta baimenaren planoak ikusteko moduan ez edukitzea.
- e) Okupaturako eremua ez garbitzea egunero eta modu egokian.
- f) Musika-aparatuak, bozgorailuak edo ikus entzuneko elementuak instalatzea.

- g) Auzokoen atsedena errespetatuko ez lukeen zarata sortzea.
- h) Mahai irisgarria behar bezala kokatuta edo identifikatuta ez egotea
- i) Ordenantzako baldintza orokorrak, espezifikoak eta instalatu beharreko elementuen ezaugarriak ez betetzeagatik arau hauste larri edo oso larri gisa tipifikatu gabe dagoen beste edozein ekintza edo ez-egite, betiere nahita egina ez bada edo ez betetzea behin eta berriro gertatzen ez bada.

31.2. Arau hauste larriak.

- a) Urtebeteko epean hiru arau-hauste arin edo gehiago pilatzea.
- b) Instalaturako mahai, aulki eta bestelako elementuek lizentzian jasotako kopurua gainditzea, guztira, lizentzian jasotakoaren % 20 eta % 40 artean. Neurritz kanpoko kopurua zehazteko, elementuek okupatzen dituzten azalera hartuko dira kontuan.
- c) Baimendu gabeko espazioak okupatzea: oinezkoen zirkulazioari traba egiten diotenak, edo larrialdiko zerbitzuen, zerbitzu publikoen, eraikinen (atariak, garajeak, etab) edo merkataritzako lokalen sarbidea edo segurtasuna eragozten dutenak eta trafikoaren ikusgaitasuna zailtzen dutenak.
- d) Ordenantza honetan zehazturiko irekitzeko edo ixteko ordutegia ez betetzea, 20 minutu baino gehiagoan, eta 60 minutura arte.
- e) Konexio elektrikoak, gas-konexioak eta abar egitea, horiek legeztatzeko proiekturik gabe.
- f) Eremua artifizialki berotzeko edo freskatzeko sistemak jartzea.

31.3. Arau-hauste oso larriak.

- a) Urtebeteko epean hiru arau-hauste larri edo gehiago egitea.
- b) Instalaturako mahai, aulki eta bestelako elementuek lizentzian jasotako kopurua gainditzea, guztira, lizentzian jasotakoaren % 40 baino portzentaje handiagoan. Neurritz kanpoko kopurua zehazteko, elementuek okupatzen dituzten azalera hartuko dira kontuan.
- c) Terraza baimenik eskatu edo lortu gabe jartzea.
- d) Terraza edo eremua baimendu gabeko jarduera bat egiteko erabiltzea.
- e) Hiri-altzariak, eserlekuak, paperontziak, farolak eta abar udal-baimenik gabe kentzea edo lekuz aldatzea.
- f) Baimenik ez izateagatik instalazioa kentzeko edo baldintzak betetzen ez dituzten elementuak kentzeko agindua ez betetzea.
- g) Jabari edo erabilera publikoko ondasunetan edo alboko ondasunetan kalte larriak eragiten dituzten ekintzak edo ez-egiteak.
- h) Trafikoarekin, urbanizazioarekin, interes orokorrekarekin edo udal-interesarekin lotutako arrazoiengatik terraza jasotzeko edo kentzeko agindua eta epeak ez betetzea.

i) Emandako eskubidea iraungitzean terraza jasotzeko eta kentzeko eta okupatutako espazioa hutsik uzteko agindua eta epeak ez betetzea.

j) Baimena alokatzea, lagatzea edo eskualdatzea ostalaritzako establezimenduaren baimenarekiko modu independentean.

k) Konexio elektrikoak, gas-konexioak eta abar egitea, horiek legezatzeko proiekturik gabe, baldin eta instalazioak pertsonetan edo haien ondasunetan berehalako arriskua sortzen badu.

l) Ordenantza honetan zehazturiko irekitzeko edo ixteko ordutegia ez betetzea, 60 minutu baino gehiagoz.

32. artikulua. Zehapenak.

1. Zehapenaren graduazioa modu arrazoituan zehaztuko da, inguruabarrak kontuan hartuta; besteak beste, hauek: ekintza nahita egina izatea; sortutako kalteen larritasun handiagoa edo txikiagoa; ordena gehiago edo gutxiago oztopatzea; ekintza edo ez-egitea errepikatzea; beste pertsona edo jarduera batzuen eskubideen lasaitasun edo jardun baketsuan sortutako eragozpen maila; osasun-egoeran eta apaingarri publikoetan sortutako eragozpenen maila; zerbitzu edo espazio publiko bat erabiltzeko pertsonen duten eskubidean sortutako eragozpen-maila; zerbitzu publiko baten funtzionamendu normalean sortutako eragozpenen maila; zerbitzu edo espazio publiko edo pribatu baten ekipamendu, azpiegitura, instalazio edo elementuetan sortutako kalteen maila; kontuan hartzeko modukoa izan daitekeen beste edozein inguruabar.

2. Santzio bat jartzeak ez du murrizten sortutako kalte-galerak ordaintzeko obligazioa.

3. Zehapenak mota askotakoak izan daitezke: ohartarazpen hutsa, diruzko zehapena edo isuna, baimena aldi baterako etetea eta instalazioa kentzera edo zigilatzerara behartzea, eta baimena ezetzatzea eta instalazioa kentzera behartzea.

4. Tipifikatutako arau-hausteei zehapen hauek aplikatuko zaizkie:

a) Arau-hauste arin bakoitzeko, ohartarazpena edo 500 € arteko isuna.

b) Arau-hauste larri bakoitzeko, baimena aldi baterako etetea eta instalazioa kentzera edo zigilatzerara behartzea, gehienez hilabete batez, eta 1.500 € arteko isuna.

c) Arau-hauste oso larri bakoitzeko, baimena aldi baterako etetea eta instalazioa kentzera edo zigilatzerara behartzea, gehienez sei hilabetez, eta 3.000 € arteko isuna, edo baimena baliogabetzea, eta 3.000 € arteko isuna, instalazioak kentzeko obligazioarekin batera.

5. Zigortutako arau-hausteak behin eta berriz errepikatuz gero, honako graduazio hau aplikatuko da isunean, eta, horrez gain, baimena etetea eta instalazioa bide publikotik kentzea edo zigilatzea aginduko da, epe hauetan:

a) Urtean bi arau-hauste arin edo gehiago eginez gero, bigarrenari 300 €-ko graduazioa ezarriko zaio, eta hurrengoan, arau-hauste larritzat jotzen denez gero, baimena eten egingo da eta instalazioak kentzera eta zigilatzerara behartuko da establezimendua, gehienez hilabete batez, eta, hala badagokio, 301 € eta 600 € arteko isuna ezarriko zaio.

b) Urtean bi arau-hauste larri edo gehiago eginez gero, bigarrenari 600 €-ko graduazioa ezarriko zaio, eta hurrengoan, arau hauste oso larritzat jotzen denez gero, baimena eten eta baliogabetu

egingo da eta instalazioak kentzera eta zigilatzen behartuko da establezimendua, gehienez hiru hilabetez edo behin betiko -baimena baliogabetuz-, eta, hala badagokio, 601 € eta 1.000 € arteko isuna ezarriko zaio.

33. artikulua. Arau-hauste arinen murrizketak

1.- Ordenantza honen 31.1 artikulua eranskinean jasotzen diren isunak %30eko murrizketaz aplikatuz ordaindu ahal izango dira; beti ere, zigor-espeditentea ireki dela adierazten duen jakinarazpena jaso eta hurrengo 3 egunetan ordaintzen den kasuetan.

Goian esandako murrizketaz baliatuz egindako ordainketa arinek dakarte alegazioak eta helegiteak egiteari uko egitea eta prozedurari berariazko ebazpena egin beharrik gabe amaiera ematea.

2.- Isuna irmo bihurtzen denetik aurrera, hurrengo hamabost lan egunetan, isunaren kopuru nominala ordaindu ahal izango da.

3.-Aurreko atalean ordaintzeko ezarritako epea bukatu eta isuna ordaindu gabe baldin badago, isunaren ordainaraziena premiamendu bidez egingo da, eta dagozkion errekarquak aplikatuko zaizkio.

34. artikulua. Arau-haustea eta zehapen preskripzioa.

1.- Arau hauste arinak urte bat igarota preskribituko dira, larriak hiru urte igarota eta, oso larriak bost urtetara.

2.- Arau hauste preskribatze data arau haustea gertatu eta, hurrengo egunetik aurrera hasiko da kontatzen.

3.- Zigor espeditentearen hasierarekin preskribatze epea eten egingo da, beti ere arau-haustaila jakinaren gainean jarri ondoren. Handik aurrera, espeditentea hilabetez geldirik badago, arau-haustailaren kulparik gabe, berriro martxan jarriko da preskripzio epea.

4.- Arau-hauste oso larriengatik ezarritako zigorrak 5 urteren buruan preskribatuko dira, arau-hauste larriengatik ezarritakoak hiru urteren buruan eta, arau-hauste arinengatik ezarritakoak urtebeteren buruan.

5.- Zigorren preskribatze data zigorraren ebazpen irmoa ematen den hurrengo egunetik aurrera hasiko da kontatzen.

6.- Arau hausleari premiamenduzko bidearen hasieraren berri egiten zaionean emango da preskribatze epearen etetea. Handik aurrera, espeditentea hilabetez geldirik badago, arau hauslearen kulparik gabe, berriro martxan jarriko da preskripzio epea.

7.- Zehatzeko ahalmena preskribatuta egon arren, Hernaniko udalak gauzak lehen zeuden moduan uzteko eskatu ahal izango die erantzuleei, dena dela ere igarotako denbora.

35. artikulua. Exekuzio subsidiarioa.

1. Instalazioaren arduradunak ez badio kasurik egiten bide publikoan instalatutako elementuak kentzeko udal aginduari ordenantza honetan aurreikusitako kasuetan, udalak aukera izango du, subsidiarioki, instalazioa kentzeko. Kasu horretan, dagokien lekuan utziko dira, eta jabeak handik hartu ahalko ditu, baina, aurrez, gastuak ordaindu beharko ditu, Administrazio Publikoen Prozedura Administratibo Komunari buruzko 2015eko urriaren 1eko 39/2015 Legean xedaturikoarekin bat.

2. Artikulu honetan xedaturikoaren arabera kendu diren elementuak ezingo dira egon biltegian gordeta 6 hilabetetik gorako epean. Epe hori igaro ondoren interesatuak ez baditu handik atera, udalak suntsitu, saldu edo laga egingo ditu.

IX. TITULUA. XEDAPENAK.

XEDAPEN IRAGANKORRA.

Terraza eta mahaitxoak jartzeko jadanik emanda dauden baimenak ordenantza honetan zehazturiko baldintza teknikoetara pixkanaka egokitu ahal izateko, hiru hilabete izango dituzte lizentzia berria eskatzeko, ordenantza Gipuzkoako ALDIZKARI OFIZIALEAN argitaratzen denetik aurrera. Momentu horretatik aurrera araudi honetara egokitzen ez diren terraza guztien baimena behin behinekoa izango da baimena berri arte. Baimena eskuratzen duen egunetik hilabete bat egongo da baimen horretan eskatzen diren aldaketak aplikatzeko. Epe horretatik aurrera, terraza eta mahaitxo guztiek ordenantza honetan zehazturiko baldintza teknikoak bete beharko dituzte.

Ordenantza hau indarrean jartzean tramitazio-fasean dauden baimenen kasuan, xedapen hauetara egokitu beharko dira egin beharreko tramiteak eta aurkeztu beharreko dokumentuak.

XEDAPEN GEHIGARRIA.

Osasun-larrialdiko egoera deklaratu gero, eta pertsonen arteko distantzia soziala handitu behar izanez gero, alkateak ahalmena izango du ordenantza honetan adierazitakoez besteko baldintza batzuk ezartzeko terrazai, emandako lizentzietan jasotako baldintzen orde. Salbuespenezko baimen horiek bertan behera geratuko dira, automatikoki, osasun-larrialdiko egoera amaitzen denean.

Ordenantza honen euskarazko eta gaztelarazko bertsioen arteko alde semantikoak agertuko balira, euskarazko bertsioa izango da balioko duena.

AZKEN XEDAPENA.

Ordenantza honetako xedapenak indarrean sartuko dira eta Hernaniko udalerrian aplikatuko dira Gipuzkoako ALDIZKARI OFIZIALEAN argitaratzen diren hurrengo egunetik aurrera.

Indarrean dagoen ordenantza indargabetuta geratzen da.

X. TITULUA. ERANSKINAK.


I. ERANSKINA. - 31.1 artikuluan xedatzen diren arau hauste arinentzat zehazten diren isunak:

31.1 artikuluan zehaztutako arau hausteak honako isunak izango dituzte:

Arau haustea	Isuna
a) Lizentzian baimendutako espazioa ez den beste espazio bat okupatzea.	500 €
b) Moduluak emandako planoan baimendutako kokalekutik kanpo jartzea.	250 €
c) Instalaturako mahai, aulki eta bestelako elementuek lizentzian jasotako kopurua gainditzea, % 20 baino portzentaje txikiagoan. Neurritz kanpoko kopurua zehazteko,	300 €

elementuek okupatzen dituzten azalerak hartuko dira kontuan.	
d) Baimena eta baimenaren planoak ikusteko moduan ez edukitzea.	300 €
e) Okupatutako eremua ez garbitzea egunero eta modu egokian.	250 €
f) Musika-aparatuak, bozgorailuak edo ikus entzuneko elementuak instalatzea.	500 €
g) Auzokoen atsedena errespetatuko ez lukeen zarata sortzea.	300 €
h) Mahai irisgarria behar bezala kokatuta edo identifikatuta ez egotea	300 €
i) Ordenantzako baldintza orokorrak, espezifikoak eta instalatu beharreko elementuen ezaugarriak ez betetzeagatik arau hauste larri edo oso larri gisa tipifikatu gabe dagoen beste edozein ekintza edo ez-egite, betiere nahita egina ez bada edo ez betetzea behin eta berriro gertatzen ez bada.	≤ 500 €

II. ERANSKINA. ELEMENTUEN ERANSKIN GRAFIKOAK.



BIDE PUBLIKOAN TERRAZAK, SALGAI DAUDEN PRODUKTUEN ERAKUSLEKUAK ETA BESTE ELEMENTU LAGUNGARRIAK JARTZEA ARAUTZEN DUEN ORDENANTZA
 ORDENANZA REGULADORA DE LA INSTALACIÓN EN LA VÍA PÚBLICA DE TERRAZAS, EXPOSITORES DE PRODUCTOS DE VENTA Y OTROS ELEMENTOS AUXILIARES

II.II ERANSKINA: MODULO MOTAK ETA EZAUGARRIAK
 ANEXO II.II: TIPOS DE MÓDULOS Y CARACTERÍSTICAS

III. ERANSKINA. TERRAZA LIZENTZIAREN ESKAERA ORRIA